

四庫全書

集部

欽定四庫全書

集部

念菴文集卷二十

詳校官給事中臣王鍾健

中書_臣劉源溥覆勘

總校官庶吉士臣何思鈞

校對官監丞臣張曾柄

謄錄貢生臣李金玉

欽定四庫全書

念菴文集卷二十

明 羅洪先 撰

五言排律

中元朝謁長景二陵偕同年程松溪

史職紀春秋皇情感霜露因陳七月詩逾切終身慕奉
璋分禁臣鳴珂戒驛路結侶偕駕鸞出廓狎鷗鷺涼風
禾黍稠宿雨川原注崇嶽已開曦曲澗仍藏霧四牡歌

在途三舍暫投暮山川謹王章澤宮愜儒素登科愧劉

祠習禮鄰孔戶

故事翰林朝陵寓學宮宿劉黃祠後

夙興趨七陵澗遡纔

百步文皇此啓祥仁后亦從祔松栢鬱相望岡陵同永

固石馬象衛遙總帳神明護谷應靈飈來雲瞻仙馭度

祠官候晨昏校卒潔庭阼橫嵐夜未央悲蛩響如訴野

卧時據鞍月轉倏移樹鉦聞萬壑傳燎舉庶品布上食

儼生存陳衣想物故牲薦接堂堦駿奔競交互望瘞未

及終促班仍有赴所重黍稷馨且備祝號數訖事雖未

鳴先驅馬已驚石伏疑於菟徑闔憑顧兔再宿昔所便
速返期無誤歸報紫宸朝分酬白雪句微勞焉足多聊
自忻殊遇

癸巳元旦奉天殿侍班

一紀調元日三辰獻瑞年青陽初應律寶曆啓新編守
歲通閭闔迎鑾上斗躔朝儀依玉几御氣接爐煙萬國
嵩呼內千官獸舞前旌旗分曙影燎火照春妍奏節詞
臣頌占風太史篇銜恩齒已壯新命愧敷宣

三月十三日駕幸太學陪祀孔廟聽講彛倫堂

萬乘出銅龍千官扈蹕同金根下星漢翠葆麗春空帷

啓張皇邸庭趨奠澤宮禮嚴忘分貴道重覺師崇三月

聞韶後兩楹看夢中詩因八佾變

是年去王號稱先師始用六佾

祀豈

一牢豐法駕橋門轉周廬陞楯通垂衣臨六館委佩引

羣工見聖青衿合橫經黼座東嘉賓來孔氏憲老憶申

公如堵人瞻仰猶龍氣鬱葱共嗟儒不賤且感教之功

竊纂臣談業躬逢帝典隆辟雖遲獻頌紀事序王風

重晤劉孔修

季雅昔求鄰郡起屬上賓誰堪十載後空憶隔江人
芸館留山雨梧垣直禁宸龍泉從此失鸞血續何因
霜月嚴城夜郊原飛蓋晨鳳林同訪隱
耽得祛塵芳屨金螺嶺蘭舟白鷺津
歌雲看意概矢日見情親信宿期寧
數風沙迹易湮停驂同水遠牽思柳條新
朝檄終歸漢關繻尚滯秦
飈車不可望愛護別離身

北泉王君六十

灝氣入滄洲。高人物外流。競稱壽筆日。恰遇凱歌秋。家
世聞王謝。兒孫誦魯鄒。梁鴻儀並美。薛鳳數全俦。壻擇
俱良玉。賓來共倚樓。門前堪駟馬。壠上謝諸侯。指使神
多逸。經嘗慮自周。始知泉石賞。真勝市朝遊。願足餘皆
贅。名忘百不憂。清飈侵幘爽。新月向杯浮。結社誰先後。
當筵幾唱酬。吾宗托交重。裁句助長謳。

雨中客談衡嶽感賦

細雨滴空堦。寒燈坐夕齋。何人來嶽下。逸思滿天涯。觀

日窮高興浮湘弔古懷雪中分袂久雲外夙期乖斑竹
情雖遠滄洲卜已諧何須向平似婚嫁待安排

答同年楊虞坡

齒飲憶初年心期阻別筵從茲鵬路隔那復雁書傳
儕伴村中牧形骸榻上禪隱居山是癖桑戶病無痊
詎意勞華省相思寄錦箋投瓊慚報稱織罽感榮纏
驥尾吾慙附鴻聲爾具全中興天啓聖大雅嶽生賢
妙質金辭冶雄才劍割鉛器疑偏鎮躁志敏善攻堅
削牘尚書署

褰帷司馬權九邊清虎落萬里斷狼煙收雋能無錄平
淮算得先酒泉戎出塞甌脫地屯田賞特緣功懋資深
計歲遷建牙開壁壘曳履踐星躔夷性終多謫皇威自
合虔稍聞移豹旅旋見避龍泉凱吹雲中發恩章日下
宣台階懸玉重樞管握符專奕世金閨籍熙朝石室編
勲推唐尚父碑勒漢燕然業盛名難朽時平拙更便不
須憐潁水早已戴堯天

壽桃林工部母周氏安人七十

蓬閣驂麟會瑤池獻棗年三乾開浩蕩六甲任推遷姬
脣徽音遠坤儀屋德專助纁勞織女絕俗永姑仙儷美
梁鴻逸承休鮑永賢雲裳逢國寵畫錦稱家傳班媛東
征賦元君北斗篇已欣人侶玉更羨福成田九疇先箕
範七十戴堯天珠履門庭溢金鈿壺閣填霞觴和露液
冰碗映瓊筵青鳥歌聲接文鸞舞袖翻日增長命縷風
入鼓薰絃蒲節香堪泛榴花色對妍婺光霄掩抑娥影
夜嬋娟慶洽忘深爵詩成競續箋愚生慚末祝愛子昔

同騫共喜留萱背言期酌赤泉

外母王淑人五十

南陸開修景朱明啓麗祥時亨靈種茂慶洽濬源長五
世奇占叶三元泰運昌金螺含瑞彩白鷺孕瑤光重襲
槐庭蔭來儀桐水陽釋絲天作合瓊樹世相望雲從疑
歸姊羊車類聘王錦緣芬郁郁鸞綴動彭彭方解芙蓉
佩躬操卷耳筐却鉛勞主饋斷帛示周行蘋藻春生澗
芝蘭蚤媚腸結縞申女戒截髮薦賓觴肯蓄時堪禦甘

分食不皇九儀昭聞範五族守彝常夫子當時傑郎官
廿載強雅操聞表著儷美共翱翔孝肅苞苴絕于公政
理彰雞鳴資警飭鶴省得明揚貞曜身能隱向平家遂
忘田園繫孳畜伏臘飽羔羊共羨椿齡富還驚萱樹芳
寵光迴照耀奕葉疊焜煌神厯觀階莢仙籌拂海桑洛
龜書五十坤馬利無疆德益形偏勝年登物共康象筵
羅碧砌雕席接蘭房悅影流銀漢冠雲切綺梁玄蟬猶

在髮青鳳總輝裳燕賀姬姜集蹄輪道路忙重闌交壁

欽定四庫全書

念菴文集
卷二十

六

映嗣服儼金相帷拂駕驚對杯傳鸚鵡飈續紛連寫綬
雜沓通笙簧儀享陳嘉幣歡承舞艷粧瑤池桃正熟王
井藕先嘗羨和錢鏐堆盤餐方翔麋膏濡多越秬雪膾
必河魴豐草遄晞藹卿雲高宇張忽飄濯枝潤應散雨
花香輕汗消蛟殼清陰轉綠楊密簾堪避暑爽吹已飛
芒賓主誠交獻兒童喜更狂追陪時不偶掩映日將蒼
林暗來山翠蜩鳴送晚涼南風發天籟北斗挹霞漿弄
葢疎螢度啼花嬌無藏嫦娥分秘藥織女報華章寶燭

星初爛金莖露欲灑椒馨咸飫飽鄴詠恣徜徉湛湛歌
無醉沈沈夜未央千金酬悅懌四座韻鏗鏘葭倚吾何
幸桃夭早見將庸凡同下里采擇愧東床冰玉人虛擬
寒暄愛詎當仁慈瞻父母銜戢閱星霜令節欣遭際愚
衷倍激昂况恩深酌海效頌願如岡頌弁情何極嘉魚
福自攘誰招金穴鶴見說玉山糧王母丹臺訣麻姑紫
石方長年逢此夕明月在高堂

絕句

欽定四庫全書

念菴文集
卷二十

七

對月

雲來月始昏
照雲還是月
雲能掩月光
不能損月魄

同江別兄廷章醉後漫歌

二首

同水南風急
蘭舟不忍開
臨分重把袂
歸信幾時來
休歌渭城曲
楊柳思依依
明日秦關客
江州雲樹迷

山水四詠

桃花滿村郭
山雨鳴鳩鳥
柴門午始開
苔蘚無人掃
稻畦陽羨田
蓮花大堤路
打魚莫唱歌
驚起雙飛鷺

黃葉萬山秋白雲千里暮高樓明月多懷人在桑戶
巖扉暮自扃林雪光如曙何處是梅花聞香不識樹

夢中作

望望江門路時人莫知處欲尋碧玉樓會向白雲去

夜坐 三首

結廬向南山日夕入佳氣豈不淹歲年地遠心所慰
林深山徑幽蒼苔蔽白石閉門今幾時物態異疇昔
月色滿空庭夜靜絕人語忽聞發幽香花樹知何許

寄孫錦衣 四首

錦衣先禁旅日日奉金鑾立仗螭頭近傳呼雉尾寒
將軍下殿直自鞚紫騮韁馳道鳴鞭避章臺索酒嘗
禁城春色早夜半發征輪記得門前別牽衣指暗塵
不堪客舍望正在帝城南馬草前生夢鷗夷後世談

夢秋過瀛洲

曠野風沙曉崇丘灌木墟地猶滄海郡人上太平書

登天池絕頂用龍溪見懷韻 二首

爲去林逾靜，龍過雨尚暝。空餘孤棹，月夜夜到南楹。
絕頂半江吟，偏增念遠情。望窮落日處，覺有御風聲。

題南源菴壁

一宿東山下，山高雲霧深。何時重策杖，月出聽猿吟。

莎雞

振羽候初臨，近宇鳴何切。道人默忘形，聞性曾不滅。

醒心

六言

世間百色是誑，見中一句成非。花開花落，有種雁南雁

北同歸

永豐道中宿安溪鄧東園家 二首

暮雨柴門客到春來耒耜人歸夜深不談鹿夢倦來共

卧牛衣

門外竹林啼鳥牕前流水飛花沮溺老來忘世希夷眠
處為家

西樓間立

隔岸夕帆繞浦高陂春草聞牛林外斷煙一縷幽人正

倚西樓

洞中

日永洞中無事泉來石下松邊不辨人間何世薰風時
醒間眠

南旺湖

百年風景茲奇絕到處江湖却欠詩驢背不歸秋易老
黃花也解笑人癡

七級閣

月華千里照霜空異地扁舟旅宿同何處鳴鴻來夜半
西風吹落玉簫中

罷試有感

逐逐風塵耳目交又將綺語向人拋何當收拾真囊橐
月下柴門靜自敲

論學

四首

燕人比擬談荆璞遇得卞和良可憐多謝青田能惠我
從心兩字是真傳

自得而後能周知良知未致
欲求知聖人境界其能得乎

世上那聞頃刻花不須多計問仙家黃金若買真丹訣

爐火還看九轉砂

尋常作工夫便欲講求得無弊此欲速之心磨礱方有光輝如今安得盡

是

黑白人人有兩眸良知何用苦多求向來枉費追尋力

只為千言萬語愁

如今只用分別善惡工夫安有許多牽絆為言語分疏

既知務本為先着莫動枝枝葉葉心一日化工如自足

千紅萬紫徧園林

既知培本便是扶疎之勢即為知止一向愁東愁西何故

欽之次良知韻意有所疑賡以解之

七首

休論心迹動懂懂忘我方堪語聖功若道漁樵能起我
漁樵還是一叅同

溫溫恂恂一仲凡當時諂佞見何迷後人莫指前人笑
一種門牆一種疑

只要在手是金鍼繡上從人巧着心十樣駕齋十樣繡
從前繡譜向誰尋

欽之有康齋路上任吾尋之句

指南車定發行時步步還為萬里基不問涯途深着脚
古今誤盡幾男兒

能不求知是甚時少留意處自家知當年沮溺非吾見
見得宣尼却是誰

畫中描畫是阿誰真偽由來具眼知一見梅花疎影後
豈須點綴倩人為

庾嶺梅花開落時天然消息少人知祇愁說到孤高處
四海春風擬待誰

有感

無規模處是規模百尺樓臺定在初若待美材還少斲

旁觀應笑是模糊

一樣根株一樣花不須牽綴鬪紛華而今我亦無多說
剖破藩籬是大家

故人原壤非為澤禮貌匡章亦可疑不賴此心忘物我
那能如鏡了無私

乾坤元氣浩無垠花鳥般般自得春如欲般般春事好
休從形色費精神

天籟

靜極初生動即消無端風雨入清霄誰知擾擾氛塵內
自有元聲在寂寥

靜坐

影滿棠梨日正長筠簾風細紫蘭香午牕睡醒無他事
胎息閒中有秘方

史書嘗喜誦名臣忍見清風染庾塵病卧如弓閒自哂
從前意氣屬何人

寄王養明

玉虛清晝鳥關關一別春風幾日還此日囊中應得藥
白雲深鎖葛峰間

清明日過南禪有懷李伯實

百舌聲中柳色新桃花何處鬪青春可憐澗道清如舊
不共當時洗足人

匡廬

曾踏匡廬百萬峰丹崖赤瀑紫雲重傳聞綺閣遙相望
總為金芝不易逢

萬壽禮成送張倅

君王萬壽臨秋殿
淮海諸侯入鷺班
自笑官聯依豹尾
始同方嶽望龍顏

晴舟

罷官歸後訪同遊
心事誰為不繫舟
今日逢君江上路
月明歌棹動眠鷗

彭石屋山約成

六首

石屋先生卧白雲
年年秋月嘆離羣
因憐世路多逋客

早為山靈布檄文

我已無名在市朝
青山同籍不須招
開軒縱欠三旬睡
取解須拚一醉饒

五畝山前種秫田
惠風靈雨慶豐年
麴方抄得多山草
醉夢成詩識洞天

無勞謝客閉柴門
抱甕時時問水源
向子何年了婚嫁
龐公安處是田園

架上常封三萬卷
枕邊惟傍五千文
人來問學無言對

興到吟詩有無聞

忽聞車馬來行輩便覺清閒損道容今日始知名是累
此身不厭老為農

答彭鵝溪送花卉二首

碧莖紫蔓來名圃靜色幽香滿暮庭風雨似催春事早
獨憑欄處聽簷鈴

草堂遙對數峰青窈窕芙蓉倚畫屏不用穠花誇國色
自須小草答山靈

東廊公用石屋公韻見貽次答 四首

自愛江村似輞川
結茅故傍石林邊
桃花不記來何路
蕓葉新開又一年

四十容光朝鏡川
五千文字暮床邊
傍人欲問農家事
惟有春風是舊年

短棹歸來月滿川
洞雲多在水聲邊
悔將白日淹塵土
坐對青松閱歲年

莫嘆浮雲與逝川
自家風月落誰邊
泣麟已後千餘歲

喜獵曾驚十二年

謝彭桂峰送瓜種

少年不解自窺園空讀神農百草言今日謝君分異種
不知曾否是青門

彭方山七十 二首

秋日閒吟秋水篇是非不到竹林邊年年籬下叢生菊
自倚寒光伴醉眠

七十無心萬事閒日高松屋未開闕不妨抱甕東籬下

惜取殘英學駐顏

十月九日菊有華後三日立冬 二首

江上秋光寂寞時
寒花亦有向南枝
憐君豈是無顏色
底後重陽一月期

莫道爭妍易取嗔
清名亦未與閒身
汝今猶占三秋日
我已秋光盡讓人

十月黃花滿庭把玩開顏遂有短句 三首

曾伴淵明栗里間
千年流落影闌珊
何知寂寞荒山裏

亦有知心為破顏

幾枝濃艷幾枝稀
自倚秋風意不違
何事背時開獨晚
欲人搖落見芳菲

答友人問訊

七十二峰搖秋光
瀟湘水寒木葉黃
問予此去何所慕
雲深恐有高人藏

每宿梁潭夢王生
有訓為誦末聯既醒
足以二句

雪下尋香久不聞
梁潭江上夢逢君
寧知花意將誰好
歲晚相期伴白雲

題周應宿母金氏易飲亭

設漿亦未過為奇
饑渴由來共有之
但遣兒孫常記取
慇懃豈用路人知

贈周慎齋任騰越

霏微山雨乍晴時
柳色分舟上帝畿
料得之官初問道
篋中應有洞山詩

鰲城十八灘

驚濤遠勢駕飛鵝
伏石變怪喧鼉鼉
縱使中流失舟楫
猶勝周行被網羅

宿黃灘憶七泉

三載思君不見君
扁舟遙逐楚江雲
撩人最是秋風樹
那用啼猿夜半聞

紅白芍藥 二首

憑欄寂寂近芳叢
紅白相鮮對晚風
不是名花留客久

欲酬春意語難工

羅綺何年自結叢幽人邂逅一臨風
分攜不忍輕攀折
惜爾為容亦太工

乞竹 二首

我有仙人石室奇絕憐綠玉久披離
聞君亦愛霜筠色
莫惜孤根帶雨移

我洞壺山山更西與君相對共幽栖
不妨分與簣簣種
助得雲深斷路蹊

次三符翁韻

四首

偶學山叢一獻花
擅場勝句與傳家
補天自愧無才力
空仰瓊章耀錦霞

別種芙蓉並幕花
遠傳春句到山家
山人久謝榮華事
錯認林塘一片霞

紅紫曾看上苑花
艷香殊態聚皇家
六郎何事辭華屋
也向山居對暮霞

裊裊雙珠的的花
天孫裁剪付仙家
蓮房不與凡胎共

太華峰頭有絳霞

洞中石梅

塊然片石長苔痕誰種先天太素根
欲酹花神問消息疎枝無語又黃昏

寄題鎮江郡齋書舍

鐵甕城頭別署居曲廊閒館近何如
趨庭童子今垂老未了當年一卷書

壽竹園壺山翁六十

曾聞海外有方壺更識長房往事無我種石蓮高萬丈
玉瓶共倒醉相扶

壽郭梅洲

三年不到洞梅旁君住梅洲進壽觴却恐花神翻笑我
君顏如舊我顏蒼

壽大溪周君月臺六十

大溪溪水晚悠悠明月臺前有白鷗醉向高臺明月對
莫教人世入閒愁

華山汝思姪赴官 二首

挾策當年入澤宮，幾回風雨釀春工。
此行初試親民術，可與書中有異同。

處處相憐保障疎，庭前那復有懸魚。
吾家門戶誰相亞，清白傳來不願餘。

為華山介姪書贈坦菴弟

醉卧山樓松影邊，夢遊碧落侶神仙。
曉來乞與阿咸字，又上姑蘇泛酒船。

壽龍北山八十

解綬誰能應虎符
身隨大將戰鄱湖
至今白髮身猶壯
解說當年八陣圖

四日至洞見梅

春日初臨已艷陽
石門自啓入青蒼
莫言洞裏無供給
已嚙梅花到骨香

對雪 二首

悄然窮戶復誰憐
新歲先占大有年
野步早誇珠在袖

林吹還似玉生煙

聞道瑤池天下奇
瓊花琪樹發春枝
偶然一夜冷風至
移向人間人未知

晚坐
四首

竹影蕭蕭漸出牆
閒庭幽思在匡床
林居莫道全牢落
繞屋蟬聲送夕陽

家住橙溪原上村
林深徑遠隔柴門
忽聞犬吠疑來客
又是花陰弄月痕

不學陶朱自蓼魚晚來倚樹步虛徐飛鷲流影來何處
驚起游鱗二尺餘

近戶青梧枝葉舒深秋結實亂垂珠年饑不畏無饘粥
升斗還當擔石儲

送朱子 二首

彭蠡之西五老峰當年白鹿有遺蹤憐君此去多春草
岐路分遠不可從

北固遙連鐵甕城瓜洲月上暮潮生不須數問圖山路

聽得吳音自有情

送河南教諭

春風匹馬送河南行李無多書半擔
道上行入休見訝
五經雖少不輕談

上官澹軒六十

塵中擾擾生為累
世外悠悠夢亦閒
但得此心真似水
不須更祝壽如山

贈九江陳兵憲

十二首

海上倭奴窺漢闕
儒臣籌策未應閒
陳平早見推三傑
馬援休誇靖百蠻

桑落洲前煙水遲
石頭城下樹旌旗
簡書報道三更使
金鼓來徵六月師

皖城東下即王圻
節使聲援壓陣飛
自煉六丁占朔氣
更擐重甲冒炎威

兵家八陣疊鈎連
號令初傳識將權
欲斬鯨鯢消海怪
先分龍鳥試江船

黃頭水卒領艨艟賈勇爭誇朝氣雄
水底斷蛟初拭劍雲間貫鳥乍鳴弓

南人使船如使馬長江為塹復為池
水國莫言難用武金陵何事也防夷

九江山色壯名州千里軍容鎮上游
自惜寶刀堪報主豈緣金印覓封侯

誰道撓擒出夜分鍾山王氣五龍文
登壇不用觀風角飛檄端能靜海氛

尊俎應知得筭強九重
宵旰在封疆北邊將
殪入驕種南甸先梟日本王

捷騎朝朝郡國聞
東南財賦正紛紜
將軍莫奏饒歌曲
天子曾焚露禱文

丈八蛇茅水上橫
賦詩醺酒氣難平
何知歌舞三吳地
化作煙塵百戰兵

洗箭歸來挂戰衣
帳前銳卒半金緋
不是書生輕破敵
欲令吾道顯圓機

重別袁迪并東趙中丞 三首

雁門秋色日鮮新
驚見中丞奏記頻
莫道南人無武略
毛錐還解掃邊塵

棗林村外騎如雲
匹馬長刀獨出羣
爭看雙鵬隨箭落
邨顏今是趙將軍

捷音千里報平戎
露布文章大史雄
封入九重偏動色
朱衣先賞奏書功

李忠定公紹興罷相自洪移福懋寧化草倉廟

有題潘令時宜即廟為祠用韻寓弔

二首

一言興廢竟誰明不重南遷畏北征
二聖淒涼留五國孤臣嗚咽望三京

此恨悠悠不易明未排閭闔且孤征
舊都安在新祠啓聽得遊人說蔡京

洞中種芙蓉

桃紅李白莫相猜祇折芙蓉傍石栽
多少春風長荊棘秋光何惜數花開

悼亡 三首

年年寒食問錫糖糝米炊餠入夜忙今日一杯同水上
杯盤滿地有誰嘗

閒堦日日捲紗聲常恨新綿紡不成不識剪衣焚寄與
可能長短似平生

早晚問兒寒與饑夜深宿火待兒歸兒今漸長衣衫短
手線還誰問密稀

洞中別蕭生 四首

洞下流泉春正深
洞前新竹翠陰陰
問君此去何年返
對竹飲泉空素心

巖下疎梅舊幾枝
今年春色較遲遲
叮嚀風雨休相撼
正值青青結實時

煨芋爐邊客到稀
歲寒何事又相違
長安也是降心地
風雪深時歸不歸

柳下不知卑小官
萬鍾一芥等閒看
書來報我平安字
可是心能處處安

有感贈羅鎮峰

三首

共是深山種樹人，獨看籬落護深春。
無情底事來風雨，不管飄紅易損神。

海賈南來萬里孤，不辭合浦自投軀。
憑誰為語臨淵客，縱得明珠已是愚。

懶畫蛾眉任買金，長門偏是草煙深。
可憐夜夜長安月，只照容顏不照心。

寄別凌海樓

二首

陽田客至不相聞只隔山前一片雲蓬髮蕭蕭還自哂
未知何日再逢君

滿縣桃花春不留恩江江水逐君流後人記取栽桃意
多少蒼生未解憂

知幾卷

二首

一杯談笑動奇兵何必危橋始動情煙雨春江花似錦
行人誰識鷓鴣聲

明月洲前秋氣多漁舟輕處任風波古來玄測饒空筭

輸却成都賣卜窩

答彭石屋

莫怪秋風作意狂
洗枝吟葉自淒涼
而今已得蓮華地
不傍他人借藕香

訪兩峰師泉梅園三君三舍山中

二首

山上桃花山下蹊
幾人衝雨復沾泥
憐君早得春風句
不向桃花開後題

二月松華未上枝
石橋流水去遲遲
東家酒熟西家醉

山下客來人不知

洞中平道 二首

洞中十載費經營
歷盡崎嶇得坦平
樂事漸多秋漸晚
幾人還解踏歌情

石磴巉巉苔蘚殘
倚鋤幾度鑿荒寒
後人莫指前人笑
失脚方知着脚難

偶成

故鄉久別斷音書
早晚歸來一室虛
門巷似前何所別

僅無徑草費芟除

九日如玄潭 二首

青山隱約霧中看
黃葉蕭疎夕照殘
喚得漁舟來借渡
隔江人影在闌干

清霜十月未沾衣
碧樹高低滿翠微
欲問峰頭雙劍石
舊時黃鶴傍誰飛

四樓詩 四首

賀監風流今已希
鑑湖流水尚光輝
洪都不道山川別

也有樓臺送夕暉

右鑑湖

溪前山色碧嵯峨楊柳陰中古巷多最是村居堪佚老

月明誰為聽漁歌

右水月

十里平林曉望中故家喬木遠含風人間綠野尋常見

何事惟傳裴晉公

右綠野

閱盡繁華只等閒紛紛市鼓競春還野人不解年時改

却道春流水間

右留春

贈表弟李孝子仲

李仲吾邑谷村翰池人也早喪父與母歐陽獨居家故貧

嘗授徒給朝夕已而室廬盡傾依舅氏居母嘗
病痢逾年不瘳仲不敢頃刻離左右則百計營
具藥食備經茶苦形羸面墨久不懈病劇傍徨
不知計出乃仰天悲泣持刀自刳股肉烹粥餉
母母食良慰又逾年始亡仲毀瘠幾殆仲為予
先大夫人羣從姪其為人質實其孝聞里咸知
之不獨予也李氏在宋有籌衡二孝子廬墓邑
中匡山下朝廷表其門又數百年乃今得仲不
已鮮哉有司方坐多故未有以其事上者然其
貧又特甚茲將如廬江訪其父之故友與其族
人愧余力不能振因贈以詩俾見者有感
勿以衆人視仲抑亦揚善順命之道也

亦知母病已危哉刳股還瘠病可回股痛何如心痛苦
兒身元自母身來

昭君詞 十八首

王嬙事本不足傳古今作者多主悲怨至所謂漢恩
自淺胡自深人生樂在相知心斯於忠信也薄矣予
實病焉間嘗有擬竊取哀而不傷之義詞不盡達覽
者其正之

身在三千誤有名一朝詔下出長城相逢惟有關山月
曾照宮中弄影情

長秋纔引到簾前名姓誰知外國傳記得君王回盼處

肯分相識不相憐

行人駐馬莫驚嗟處處溪流有落花不待今朝悲遠嫁
長門風雨即天涯

淡掃蛾眉恥乞憐幾回春色負華年而今不恨天涯別
恨不遭逢未別前

情知馬上去無還遙指干旌認漢關縱使生前胡地老
歸魂猶得見南山

使臣何日發長安乍到邊頭可奈寒多謝監宮頻慰藉

得恩何似得歸難

愁向胡天別塞垣
一聞南雁一銷魂
妾心縱得隨明月
解近君王不解言

不是君王愛不均
妍媸自古易迷真
明光咫尺猶難辨
何況飄零萬里人

翠華相望不相聞
空卻巫山一片雲
何事夢中還萬里
竟令無路近明君

誰將絃管奉君王
明月樓中夜未央
出塞聲高調不得

由來此曲斷人腸

鷓鴣泉上鶻鶻殘滿地黃雲覆草寒遇得花枝那忍棄
棄時容易遇時難

鳳釵驚鏡久生塵三月胡天不識春寄語女郎須愛惜
從來脂粉誤人身

馬前雙臂海東青擒得哀鴻不忍聽我欲南歸無羽翼
問渠何事度龍庭

見說蒼梧杳靄間風波帝子幾時還胡沙恨是無湘竹

淚灑千行不作斑

八月天山雨雪重夢中猶記采芙蓉當時水殿爭涼處
同伴如今可憶儂

夜夜秋風帳外驚黃河東去帶悲聲無情只有西流水
下隴何因訴不平

天無窮盡地無邊此日愁心亦復然賴得琵琶解傳語
淒涼惟有後人憐

黃金縱買毛延壽玉貌當如薄命何多少佳人怨憔悴

筭來不屬畫圖多

題西湖圖

一宿危樓俯萬峰滿湖漁火五更鐘
開圖空憶當時景却有何人識舊蹤

寄丁安仁聚鄉

張古山前溪水橫幾回吟眺上孤城
願君為政如溪水縱有風波不改清

與國光姪

傳聞劍閣倚天青曾是當年鑿五丁
隨侍爾知觀險阨
書來能寫萬峰形

客歸

鄉關久別夢魂驚十載歸來百事更
惟有門前楊柳色
春風不改舊時清

晏母孤節 二首

慈親辛苦教兒專祇計詩書不計錢
豈為暮年資祿養
能通官政是家傳

自惜先人志未酬
教兒游學謁諸侯
試看官為題門日
何似賓來截髮秋

梅溪 二首

洞中梅發手常題
祇欠花前水一溪
我笑欠溪君欠洞
世間勝事許誰齊

梅落清溪水亦香
汲溪烹茗客同嘗
石邊我醉梅花月
兩地幽懷誰短長

李汝思南昌新居成有贈

君家盤谷住街東五渡門前一棹通今日結廬南浦上
曉來煙水故鄉同

悲荆川

三月櫻桃紅滿枝江頭紫蟹乍來時旁人莫話毘陵事
須盡毘陵誰得知

葵花

紅葵赤葵如曉霞不見天地不涇斜報道故人須早至
庭前尚有未開花

題仙居寺壁圍棋圖

石磴連雲竹樹垂
洞門深閉落花時
人間幾度春風老
未了仙家一局棋

題陳搏睡圖

當年曾買三峰住
丹詔猶聞下九霄
烏是逃名漸不早
未須遠避聖明朝

宿龍華寺海天秋月堂

二首

半月高齋對鶴眠
客來無日不探玄
不知何處人間世

拚與青山靜結緣

孤塔侵雲萬木深
新寒臺殿夜沈沈
重來舊侶那堪問
明月堦前霜葉吟

題雲儲洞夢樓

黃葉鋪堦枕碧溪
白雲深處不聞雞
廿年塵土俱間夢
肯受山靈幻境迷

九月晦日何君洞

雲裳已遠石床橫
洞裏菖蒲歲歲生
欲燭金書討丹訣

月華未吐坐三更

天池寺

顛仙丹成獻明主半留天池人莫取出岫常為一片雲
有時解作千峰雨

凌虛閣

道人相邀巖畔宿鳥語泉聲響林麓分明不與世間同
六月寒風撼巖屋

文殊臺

文殊去後祇空臺臺上優曇更不開說法本非陶令喜
野狐休向夜深來

夜夢藩省為余建坊題曰白雲深處間人遂成
二句覺後足之

白雲深處間人少惟有希夷似不羣今日高眠千丈頂
遠書休遣遞飛雲

題青螺寺涵白僧


巖石青青梧葉黃石泉竹徑對僧房慈航苦海今何在

一部楞嚴在佛旁

石峰僧

石耳峰前古寺秋逢僧留宿話裴休有人問汝因緣事

莫道前身是石頭



念菴文集卷二十

欽定四庫全書

集部

念菴文集卷二十一

詳校官給事中臣王鍾健

中書

臣

劉源溥覆勘

總校官庶吉士臣何思鈞

校對官監丞臣張曾柄

謄錄貢生臣李全玉

欽定四庫全書

念菴文集卷二十一

明 羅洪先 撰

五言律

奉家君命遣入侍感述

唱第金鑾陞傳宣赤芾衣風雲真忝竊犬馬奈孤微萬
里丹心迴三秋紫禁遠經綸儒者事敢復嘆今非

寺居東王漢卿

寥聞依清梵徘徊戀景暉可憐溪谷望不見芰荷衣
躍思傳素花殘欲起飛所驚年歲異詎止惜芳菲

程舜敷謫居海上問訊

二首

迢遞瑤臺客淒清銅柱秋蜃氛朝彩變鮫淚夜珠流
影通天遠嵐光接地浮深憐挂席往何日度瀛洲

金闕虛仙望丹崖識漢功魯連非棄組安石忽乘風
蒼悲形似靡蕪怨歲窮征颿逢北上素鯉寄南中

懷友

獻策動京華還山種桂花從知卧金馬不及鍊丹砂五
嶽廬教杖三秋博望槎伊人竟何在歲歲望蕪葭

同江送從兄廷章之秦將取道入燕問官

分影悲連理鳴榔聽采蓮夏雲千里映湖草一帆懸漢
水南連郢秦關北接燕無嗟歌和寡會見棄繻還

贈王武庫入京

蕙省策天兵牙旌赴禁城長安朝日近司馬夏雲迎青
海連胡騎金微絕漢旌和戎非武略何日請長纓

寄楊實卿

燕歌別易水蜀道隔湘雲江柳年年綠攀條獨憶君啼
猿渺何在來雁不堪聞莫就成都卜玄經自有文

高洲劉述文

高洲似赤城遠屋種黃精溪水桃花色煙林布穀聲記
年從漢魏混世狎公卿莫學劉郎隱尋山更得名

將入衡山酬韻貽別李文輿

分袂懷蘭畹飛帆倚桂舟白雲何處所綠樹是南州古

嶽連雲起清湘抱月流鳳笙如可望佇爾太清遊

哭羅生汝奎

一日千秋別孤雲萬里心誰憐泉下士元是席中珍桂
館留殘榻玉壇空暮林高深閱古調不為惜知音

哭羅木夫

五首并序

十載江城面三年夜雨親道交久不厭志逸老能貧歲
月憐分影乾坤隔幻身殘軀新讀禮感事倍傷神

彩服趨庭處烏巾對月吟橙溪秋自好椒醕爾難尋蝶

夢無醒枕猿哀有淚襟思親悲似貌今日失知音

叔夜塵緣薄初平道氣深酒醒仍荷鍾身老不留金白
日哀迴駕青鸞渺去音臯比讀易事淒斷不堪尋

陰陰傷歲暮歷歷對山原嗚咽泉聲斷蕭森桂影翻牛
衣空自去鶴樹竟難言長歲歸鴻急荆丘日露繁

招魂路杳隔埋骨日幽陰歲月芳蘭歇風霜宿草深羅
含留故宅鍾子絕鳴琴把劍悲重約題碑寄夙心

余壬辰秋九月與三潭子泣別同江之渚時先大夫

在堂而余之遠行實出公期促迫期改歲當假王事
南歸省覲與三潭子必重晤得徜徉山中與菽水樂
別未半朞而先大夫見背逾月則三潭子亦相繼推
逝明夏奔歸則與三潭子永隔而江渚之泣蓋永訣
矣哀哉乙未倚廬將畢追思故交心肺割裂遂抑鬱
宣悲為輓詩八章雖於聲律之學或未諳識至於論
世庶有徵焉矣

贈羅仲良奉母之令應城

仙舄度秋槎翩翩楚水涯琴和訟庭鳥綬綰夾城花地
潤通天澤星文動物華潘輿近鄉國為吏莫長嗟

劉生

劉生多意氣執別歲華深一蓑不肯渡四愁空自吟春
江斜檻外暮雨對峰陰古調人多棄泠泠鳴素琴

送從叔遵禹如白河

名惠言

弱冠振孤翰芳襟逐二難荆花春苑紫竹葉暮江寒日
向長安近雲依故國看丁寧萬里翼莫向一枝安

追徐子直至金山不及

迢迢江上雁離翼隔雲天未結芳蘭佩空歌伐木篇
蒿殘人已遠潮去鯉難傳獨下徐君榻清輝共月眠

贈大司馬東塘毛公征安南

二首

天王懷異域尚父遠專征萬里軍容動三年廟算成
河魁占上朔海若避前旌不待過銅柱交首自請纓

禹貢要荒服虞廷干羽通誰云南極外不麗大明中
兵洗枕榔雨帆歸舶舫風無令窮海國但數伏波功

江上作

孤棹寒江上，離情落雁邊。
我身雲水似飄泊，定何年同
旅。非棠棣他鄉，問杜鵑不知故園夜，誰為客程憐。

攜李見月

攜李逢良夕，明蟾落桂華。
離情屬秋暮，兩地望天涯。
靈藥空傳世，清輝苦憶家。
關山千里外，盈晦動長嗟。

泛東湖

大澤聞彭蠡，為舟泛碧灣。
天低疑拂樹，波遠似侵山。
極

浦多推楫中流有宿管澄清十年思川上動秋顏

嘗奉先宜人過常山重經正值忌日感賦

哀節來何促慈顏去不歸筍輿難奉馭竹淚自沾衣寒
水聞悲壑疎林見遠暉不能五鼎養空駕駟車飛

發北新關初聞孤雁寄東牕叔

紫塞分寒影清江入暮深遙憐失羣翼還似獨遊情匝
月疑衰葦迷煙滯古城南歸書帛杳為向故園鳴

唐應德避暑郊居與林子仁訪之不得用韻寄

贈

出郭尋芳侶高林絕世氛何知望雙翼無異隔重雲
聽鶴疑笙轉寒蘭感袂分托躬自有別不敢怨離羣

譚御史巡隆慶

二首

繡斧向邊城蕭蕭驄馬鳴黃花經絕塞獨石樹前旌
乘月旄頭暗驚霜鶻尾輕何憂李廣輩塞外不橫行
漢使出關雄連山野燒空星文移畢口風色變雲中壯
士千金諾將軍百戰功即看揮白簡不數賜彤弓

贈鎮守備李將軍

武略重邊營，兵符出禁城。
將星三楚動，殺氣九溪橫。
魚鳥開行陣，蠻夷服耦耕。
會須靖南服，重見拜西平。

歸興

家世由農圃，乘春返故郊。
衣穿緣久客，書絕為慵交。
舉耜看鶉火，占風俯鵲巢。
平生存拙賦，不嘆繫秋旄。

玉山贈詹少華給舍

早歲甘辭祿，他鄉重倚廬。
為園聊給食，閉戶自刪書。
月

影花間席苔痕門外車人生貴有托榮達竟何如

同黃洛村宿羅田巖

心迹渾無繫行歌恣所如偶逢紫芝客邀入白雲居清
磬聞僧梵寒燈檢道書誰能甘役役徒使二毛疎

自石埠夜棹玄潭

懷人適未遠宵逝獨揚舫為慰停雲思寧知清露零草
聲遙識岼煙色近迷汀耿耿看河漢何期見聚星

別劉良溪

與君重識面居然見幽情如何二仲子獨高千載名急
雨春江白深林野鶴鳴此時憐把袂翻畏棹歌聲

訪廬天啟

重訪意中人同遊物外春為看容鬢改始覺歲年新疎
竹見山色高齋歛道真由來遯者逸勿謝往來頻

寄同年祝岫巖二首

孤厓懸古木秋月靜蕭森獨坐忽忘去洲前江水深青
青山自遠脈脈歲將陰已識鯨魚性投竿非我心

君住衡山下春風幾歲華石疑封玉檢水似注丹砂欲
訪前朝隱猶聞去路賒桃花開已徧雞犬為移家

萬鹿園總戎卧病臨江邀晤天王寺

不矜萬戶貴但愛五千文身病人誰問鐘殘性自聞慣
邀鹿苑士厭對虎符軍底事頻推轂憐君重報勲

賦得青驄馬奉壽張石磐公

蹀躞青驄馬西來萬里秋駕車先豹尾立仗近螭頭一
別榴花地長年杜若洲時聞雲霧起龍友自相求

閒居

已謝市中喧巾車返故園詎云藜藿美聊免愧盤飧落
日沙邊岼疎煙野外村不須談至理事簡道應存

夕泊文江邑中故人追餞至灘市

虛舟無所繫江上恣沿洄故人不相捨日落且銜杯市
火深林見灘聲靜夜來那堪當此際歸棹暗相催

餞同年薛畏齋 二首

聞君亦報罷理楫遂東歸達者豈不適其如人世遠嚴

城虛暮折舊館振春衣知向山中爽無心談是非
送君不忍別酌酒暫為歡塞馬誰論失江鱸今可食買
田多種秫養竹自栽冠倘遇南來雁因風托素翰

與邵綸

相逢春晚別煙月返孤洲却憶少年日曾登萬歲樓山
城朝映雨潮浦夕移舟欲寄離情去江流不解愁

同年胡前岡母恭人八十壽詩

二首

崇閥疑繁祉慈闈積永年厯更五朝後名達兩宮前娛

綵隨卿月行厨借御煙至今逾一紀福履益穹然
解愠風初至承歡月正舒節催長命縷年數後天書儼
席紛華佩克間獻瑞珠只輸青鳥宴人世渺難知

閒述

一近耰鋤業妨時怯送迎每逢田父語漸見古人情夜
雨肥園菽春陰轉谷鶯為農豈無事大半是勤生

避暑玄潭晤羅鎮峰兄

與君同遠俗問訊一何疎避暑逢高會連宵談道書遠

江橫雨勢虛閣振風裾但使無違願瀛洲定不如

逢雁

幾時來塞下烽火近何如道路多知己寧無一札書江鄉今苦旱瘡癘且難除處處多繒繳投身未可疎

大墓山哭亡弟造夫

二首

骨肉俱如故音容爾竟沈可憐一抔土遂隔九原深執手難憑夢何言可寄心亦知年向老猶自淚難禁

去路知何處頻驚諱日臨誰堪七年病猶繫九京心過

雁書難到寒塘草自深秋風正蕭瑟更奈候蟲吟

九日聞雁

江水斂寒色一雁下汀洲正此九日節忽來千里秋無
心問書帛幾日到衡州為報山靈道風高雲易收

南嶽上封寺

絕地敞龍宮千峰擁祝融煙雲遙泛海樓閣盡懸空檻
俯湘中樹牕來天際鴻不須談棄屐雙舄正乘風

祝融絕頂石

雲路轉高寒秋空入大觀石從雲漢取樹傍白榆看忘
語天休問齋心露可食不因避象外那解出塵難

穿雲入方廣

雲裏度遙岑臨虛谷轉深石迷多伏虎樹隱獨聞禽乍
識為霖意誰明出岫心鴻濛如解語吾欲寄瑤音

別方廣

坐石忽忘去買山無後期不憐生是寄翻以愛為悲門
憶曾題處松看初長時千年風與月來者自栖遲

出方廣道

齋心踰一七經義破三千黃葉石間路青松山下泉客
遊朝復暮禪定日如年回首鳴鐘處深林隔四天

彭蠡見雁

秋過衡陽浦春還彭蠡居迢迢關塞遠此去意何如水
濶飛難盡沙平影易疎歸來倘未晚為報故人書

龍池

瀑布下千尋龍池煙霧深還將一勺水自洗百年心混

俗緣何事勞形直至今浮蹤從此定塵土莫相侵

晴日江上

春霽媚行遊春潮靜不流衣薰疑日近棹動覺天浮
纚纚煙光合絲絲柳色柔江南風物美大半在汀洲

移崆峒山莊

嗜寂能安土移栖欲近田還因數椽舊得此一區偏牆
短從山入庭虛待月懸寧知師儉意於分且宜然

東隱

林居乃其業豈曰遠塵紛日出親耕鑿山深斷見聞拙
無言作賦窮不送將文我已甘逃世年多未識君

忠節祠前誠齋先生手植羅漢松

移根自祇苑遺愛為誠齋曾借琴書潤猶當俎豆階地
靈人自美風古色逾佳剪伐寧湏戒伊人衆所懷

閏九日石蓮洞

季秋逢再閏佳節復重陽故向分陰惜偏忻九日長菊
遲如待客酒至且流觴莫厭登攀意良時未可忘

野燒

冬燒入雲端連山照暮寒
隱峰霞欲爛銜嶺月初殘
明滅緣風度蒼茫隔水看
因思關塞地烽燧若為安

洞中見月

西月下巖闕流輝絕壁間
照巖分石勢穿樹落衣斑
洞壑龕燈淺樓虛齋磬閒
貪看不成寐澗水遠潺潺

聞劉龍山入洞

為期久不至忽枉暮相聞
賴有巖頭石峇堯可伴君
野

煙迷樹影舍火遠人羣坐聽風林葉能無客思紛

贈何郡公入覲

上計會衣冠衝星五馬寒還因獻玉帛重得拜金鑾庭
瑞勲庸辨宮筵禮數寬聖躬勞萬國莫更述民艱

癸卯十月十四日予生四十矣撫已自悲而有
此吟

流光不可駐斜日再難晨不惑云希聖無聞祇畏人容
身依一室食力計三春却憶劬勞德翻憐心動頻

貽相者

神解應難遇生涯早自知馬歸臂折後鹿失夢醒時歲
久惟存櫟朝饑且刈葵學農吾分滿肉食莫相期

贈彭石屋翁

名簪靖州守

先生豈無慕終歲卧丘樊傍石結山屋為園近水源春
來時抱犢月出自開門再見三年後嗒然忘所言

別廷質弟還白河先廬

汝行遵漢水何日扣柴扉柱上題應舊門前樹幾圍屋

烏存故愛鄰燭念餘輝父客如相問遲余共采薇

寄同年程松溪

匪材慚附驥同詔入觀文何意遭逢日翻為聚散雲名
甘辭仕籍身復遠人羣多少酬恩意相看惟有君

庭中鷓鴣來巢感而成詠

微鳥來相狎槍榆愜靜觀幸無千里翼得共一枝安易
食疑量分深栖似避難謀生倘類此留滯豈須歎

李子謁選

送子江關別程途日向寒飈裘新試馬村郭屢傳餐時
偶多知己才高易服官期為清白吏共報主恩寬

古佛堂

院古曇花隱門幽徑草侵三年尋故侶孤月到深林閉
戶同齋食談經雜鳥音流塵縱滿席終覺少塵心

代贈永州王劈泉別駕擢靖州王往時自杭判
守泗今還舊服惠流兩郡有遺思云

來去為州郡升沈數每齊綬花還舊佩判草憶初題五

馬行仍遠三刀夢更西楚弓雖可喻離者自悽悽

寓天寧寺感可大兄弟歸省

兩生來就傳適我卧精廬共器餐僧飯分燈讀父書思
歸緣問寢謀道豈懷居試論西河易離羣何所如

書永慶寺壁次荊州

城陰背流水遠樹夕含風避客溪橋外逢僧野竹中問
名無以答齋食偶然同更何忘歸處方知過去空

展先澗谷府君墓 四首

秀川沈別墅春雨暗荒丘地古孤僧識

公墓久失叔汚
偏訪之夢神指

其處醒以告
僧僧乃吐實

碑殘五字留

碑止谷先生之墓五字
至今存起初神童筆也

明堂

金石賦

公以賦中第明
堂賦至今存

幽宅鬼神謀不用疑天道人生

泡影浮

玄草烏蕪後青山自一丘善和書遂逸靖節誄空留生

死同秦臘

公生死
皆臘望

悲歡在國謀黃鐘闕大雅吾道幾沈

浮

廟題猶樵院宋室久墟丘紫氣龍何在烏衣燕不留家

緣酬國盡

公家號十萬盡
餉文山義軍

天亦忤人謀
悵望前朝業
煙

雲日暮浮

直躬偏疾惡
華髮向青丘

公以劾賈似道
罷官年六十九

道繼雲林後

公為饒雙

詩同山谷留

公係江
西詩派

五噫空飲恨
萬石不貽

峰高弟

謀歲歲逢寒食
溪蘋帶雨浮

訪隱原

入谷無機事
邀逢任所之
獨沿溪澗往
忽至夕陽期
峯

影遙能辨松陰坐
屢移暝來山下宿
殘月二更遲

遊龍虎山

二首

心閒無所適高閣日憑欄
虛谷多朝氣深林生暮寒
猶龍嗟見聖煉虎欲成丹
二事吾何有逢人且共餐
坐久竟無寐秋蛩鳴向人
因悲虛甲子不及守庚申
數息知天度冥心養谷神
翻憐塵世者何異夢中身

嶺南令

邑險當新造才高特試難
分疆百里儉敷政四隣看
弁服文移簡蚶田賦入寬
無忘柔遠意聖主待民安

展先墓

生我不能養其如此日心縱令雙涕下難到九京深手
饋思常嗜心瞿感似音却憐返哺無夜夜繞空林

訪劉晴川公雲津次白沙韻

誰信元城後今人亦可尋一生無妄語千載幾知音試
問獄中事何如嶺表心道南聞已久君是指南鍼

贈王西石明府赴召

二首

王喬為縣令何地不宜才堂案旁無草衙磚半有苔庭

因疑訟出門為遠賓開此日雲間望飛鳧忽見催
遇事不辭難猶言畏曠官能採寃婦獄解辱富郎冠優
飾辭賓戲鄉音察吏奸明光今漸近從此看封彈

寄萬鹿園

春賞逐陽和川遊澹夕波觀燈傳佛性聞榜答漁歌千
里人俱老終年夢幾過秋來仍斷飲將奈白雲何

趙浚谷自德州赴山西巡撫即韻寄贈

節鉞寄專征并州古鎮城令行傳陣肅恩激顧身輕一

劍齊中出孤吟塞上行文雄經武略誰解得無名

將遊廬山別尹道輿樟墅

非無八口計其奈一身衰念與古人遠羞為兒女悲御
風隨所往歸日尚難期不用傷流滯家庭自有師

遊栗里

陶令罷官後西疇黍正滋至今栗里上猶見柳條垂山
氣佳如舊居鄰問不知誰能邂逅飲一醉寫心期

東林寺

因尋陶令迹偶過遠公廬鐘後空歸處溪邊一嘯餘石
如人聽法水向佛成渠葦酒非吾好寧緣戒律除

與日者

少年矜壯志垂老竟無成身病疑增骨人逢但識聲買
山今已遂種菊晚初榮自達窮通理何勞問許生

與相者

壯年甘勇退不得問麻衣隱卜閒情少尋仙舊念非試
看形已槁豈是遜能肥莫訝壺丘子今來示杜機

拜靖節墓

久憎折腰事再拜向高墳東晉非前日南山還暮雲將
持斗酒酌更以輓歌聞不飲緣何事低徊心已醺

自佛手巖入慈雲寺

結茅應未久初地暫相尋偶誦蓮花偈因憐祇樹深嶺
南垂佛手巖石對禪心莫作伽陵鳥終朝學梵音

病

病卧遲開戶心慵厭報書雨晴衣屢易豐歉室常虛卜

命從來鵬加餐為得魚無能身已贅縱健欲何如

趙浚谷遣袁迪來寓答

二首

南浦袁生至傳來壠上書開緘驚改歲問狀慰離居萬
卷明農後孤身破賊餘庶頗今未老誰與達公車

病多年復迫齒髮半凋殘喪室悲元亮衰門報耿蘭心
將形待盡世以夢同觀惟有纓冠意悠悠未忍安

余徙松原泰和張秋泉代余督治八旬乃返酬

以是詩

二首

橫流居盡折別業晚仍移得遂龐公隱深慚鮑叔知梓
人揮鑿處巧者食功時屋漏能無愧將何報所期
平生無遠適代役竟忘歸力盡如同舍時移且敝衣菜
根甘不厭木屑慮無遠版築今無夢空令遜者肥

送李檀坡赴蘭陽教諭

講舍別秋霖江湖水氣深還過鹿門里暫慰雁行心井
邑東昏地絃匏西序音不知經術顯門下幾青襟

聽友人送宋高郵守晁仲約事

昔日江淮盜揚言勢不支修詞遠迎勞傾帑重齎持辟
宥猶爭議封疆故有司誰知千載下此事亦多師

曾月塘兄返家

亂後還鄉井憐君家獨全歸人惟有淚故里半無煙殺
氣秋仍結殘魂月共懸西岡蕪沒處可有舊書傳

誤傳寇至鄰曲盡奔

閭里亂縱橫秋原暝色生爭傳負芻至并作泣岐行道
遠多亡子風驚似驟兵荒村獨醒處空切救焚情

永市

曉燒色何赤愁如烽火然幾人家尚在百里信難傳夕
鳥孤飛處秋山斷影邊撓捨何日掃不敢問遙天

世光子赴鄉試

一經傳世業三試逐時髦旅聚須安俗身單自惜勞朱
衣天有定寶鑑物無逃我愧科名久何心望汝曹

題江灣北川堂

林中重結宇正對采蘋洲婦汲常依墅賓來愛倚樓溪

聲臨月砌屋影動春流莫訝人爭席門前有白鷗

訪族大安

安溪喬木好風露帶戡村人以同宗重居緣異地繁田
園忘歲月文字問兒孫淳樸如吾里由來祖德存

北牕

林壑開玄奧山牕俯翠闌溜渠春澗合簾幙霽峰新牛
斗霄看劍藤蘿曉挂巾由來歲寒意還屬晝眠人

贈周侍御入京

躑躅玉花驄
驕嘶柳葉風
驚看直指使
重謁大明宮
主聖勞虛聽
民難待實封
不徒桓典似
但使要途空

贈廬陵翁明府入覲

玉帛會明堂
丹青入大常
重經門下省
應識殿中香
製錦憐奇彩
垂裳多寵光
鳳池行視草
螺渚有甘棠

桂太傅輓章 二首

聖主敷殊共
明公際寵靈
滄溟開日月
紫極靜風霆
美植出連茹
勞歌盡采苓
可憐康濟策
寂寞閔幽局

金臺初獻策彤管受咨詢寶劍虛知己青芻愧古人十
年操別鶴千載著傷麟日暮寒江上孤雲對白蘋

雨中陪同年朱刑部謁子陵祠和韻

昔人垂釣處潭影自間雲出處雖異路賞眺暫同君扣
門驚谷鳥微雨薦溪芹此夜占星聚應聯列宿文

贈曾子貞應貢入京師

蕭散愛林居聞君遠上書幾年懷照乘千里謁公車清
廟時當頌朱絃音正疎新知不恨晚應薦馬相如

舟中對月

旅行無與晤初月在江干共載中流去遙隨永夜看
注陰深灌木抱影散平湍但取明珠近寧為滄海歎

寄友人

與君十載別聞已二毛新却憶同遊處誰為強健身
遠江長映戶隱几對芳春我已捐簪紱無為苦避人

送王編修懋中省覲歸無錫

畫舫乘秋發斑衣愛日遲歸攜西掖綬行詠北山詩
江

雨鱸魚白山田粳稻垂而翁投紱早莫更滯還期

胡臺史國材見枉

避囂遠城市卜築依江村琴樽時自適車馬不聞喧忽枉靈臺史因傳相宅言為語流泉地吾生在灌園

羅邦懷太守出衛山書簞索題

寒枝斂真色嘉蕋競芳叢誰章茲物美置君懷袖中掇英動遠涉飲馥得承風慎勿輕捐棄幽情吾所同

覽鏡

把鏡千憂起如聞影答形將心忘愛惡察物任分明衰
向愁中集癯從病裏生前途知幾許何事不遺情

夜歸

宵逝逢初霽山深迷所如疎星浮野水涼霧暗村墟谷
應疑呼侶林昏錯問居始知勤四體不獨有長沮

尹道輿會試禮部

三年期共學別去意何如暮就旅人宿朝呈天子書時
平道易偶命違志寧疎莫念江潭老林塘已卜居

王生新舉鄉試便赴禮部

名宗熹

少年榮薦達挾策向明君揖遜公卿重聲名郡國聞謀
身先擇術憫世在繁文縱有高車貴相如未可羣

賀祠成

時日練柔剛追先啓戶堂即看蘭滿砌不讓杏為梁世
世藏遺服年年獻有觴還聞歌祖德頌并有輝光

暮坐

隱几不知暮喧喧瓦雀還下簾疎雨後虛室一燈間聞

反聲如脫思微識近頑從茲悟真性正在有無間

讀易

陰陽不相離往來環轉然此中有逆順當機之後先無極生太極可以譬逆數二四雖未生得一乃其據

知機吟用康節韻

先物謂之幾旁行且入微有無未分處主宰不移時得者須忘意知之莫泥詞雖從靜裏得却向動中知

謁濂溪先生祠墓

三首

匡廬開曉霽懷古見芳襟溪水清堪溯林風靜自吟山
如蓮乍發庭與草俱深此日生芻蕘還同執贄心

其二

外物等銖塵方知貴在身一抔誰不共四海此常親地
似依防墓鄉猶近楚鄰築場來已晚願作掃除人

其三

軻死誰為繼寥寥千載悲寧知無極語始應聚奎期南
笑道方啓歸與樂在茲初平還我輩聽語恨非時

趺坐

兀兀類株拘晨興忽及晡息深非一氣坐久祇單趺榻
外千峰靜門前三歲蕪諸生莫請業意句愧先儒

老至

少年能幾許已復迫衰期氣銳終防道心醒每過時積
疑忘後悟微病靜中知一見真吾在形骸豈足私

中秋憶亡弟

耿耿夜無寐見月倍淒其節迅人逾遠天高氣自悲影

憐連理樹身愧在原詩不過長生藥空梁安可期

夏幽道中

晨征覽衣露磴折歷峰雲地險風多烈林深日易曛山
禾霜後實鄉語客中聞人事隨情好吾行得所羣

訪李少舫故宅

鳳毛人所羨雁帛歲難違詎謂升堂日夫君不復歸省
蘭虛夜篆墓草怨春輝哀些能聞否招魂欲剪衣

送女兄夫周龍岡北上

三首

自嗟兄弟寡况忍復離羣對粥空懷姊加餐此贈君齋
持心莫効去住跡從分勿以家為念吾甥俱有文

其二

少年看授館母氏愛無分具食求常嗜延賓待異聞貴
遲占命屢別久寓書勤此意今誰憶空餘吾與君

其三

結茅依野樹巷僻少來車落葉滿庭下寒山半雨餘忽
言京邑去因憶貴交疎問訊休相及為農久廢書

暑病思石蓮洞

慣在巖下宿今結夢中思石室不知夏泉流無盡時崖
深臨眺久徑遠送歸遲誰忍經年別空懸翠壁詩

送饒湖田憲使入京

病身無復健忍聽雁離羣彭蠡秋風後淮南木葉紛鼓
鼙新戰士齊魯舊監軍年壯堪酬主饒歌幸一聞

葛山王思畏七十

去年從朋好同舟遣子隨達觀疑有慕祿養似非期事

簡貧常足情深惠屢推親心知所畏垂老不忘思

壽竹園秀岡兄六十

蓮洞時相見芳醪每共持忽看四歲長已至六旬期岡
上松初秀庭前桂幾枝顧予頭且白先寄社中詩

觀奕

藏身隨地足動著便堪疑兩利計為上交鋒機已危每
當拂心處頗嫌收手遲旁觀今更審鷸蚌莫相持

景德鎮觀御器

塼埴周宮舊祠襍漢時專從知器尚白始合道中玄玉
食金鋪上瑤壇壁月前因憐塵土質猶得報陶甄

子陵祠

漢庭懷舊德獨愛水雲身白髮一竿暮青山七里春江
流閒歲月夜景湛星辰千載荒祠下停舟日幾人

寄高郵太守劉松宇

符竹臨何處朝朝雲水身望旌來屬令過鷁識嘉賓粳
稻千家市菰蒲四郭鄰最憐荒歲後初有醉醒人

劉見川太守誤期晤

病卧愛林居，羈留寇亂餘。
誰能城市隱，空却夜遊書。
避地皆戎馬，藏身且蠹魚。
知君不由徑，隨地可虛徐。

送曾文洲赴建寧祭酒

八閩稱望郡，祭酒職尤清。
不對鞭笞事，惟聞絃誦聲。
諸生傳命令，六籍校章程。
問政誰頻過，時牽舊令情。

贈黃勿齋赴永明令

羨君初試邑，入境及春和。
五嶺分疆處，三苗互市多。
餌

魴堪譬改馴雉定聞歌莫厭山城遠瀟湘一帶過

龍母黃孺人六十

不負夫君托能成令子才斷機知學進減食為賓來庭
桂秋芳滿江魚曉燕開願言萱背永常獻菊花杯

乞巧


人間多道路天上亦風波卧看雙星轉聞當七夕過神
猶甘處野智不及踰河祠禱憐兒女紛紛奈巧何

皇厓壇晚

丹閣俯晴空瓊花散晚風
龜疇看禹畫鰲極見皇功檻
外雙虹轉雲中二鳥通只須乘下鳥從此度珠宮

金山寺

碧山開法鏡金地絕塵緣
龍藏元依水珠筵盡在蓮
靈鼉聞夜梵馴鳥下朝煙
不用懷三島臺高接四天



念菴文集卷二十一